

Na presidenta nueva per l'UGLD

En vender ai 29 de mei à la radunanza generala dla soziazion lité per la maioura enciaria Milva Mussner, che à giaté l testemone da les mans de Elsa Zardini, steda presidenta per set agn alalongia



L desch dla radunanza: (da man ciancia) Elsa Zardini, Milva Mussner, la presidenta dla Union di Ladins da Fodom Manuela Ladurner, l president dla Union de Fascia Fernando Brunel y l president dla Union dla Val Badia Michael Moling.

Urtijej/1 - La radunanza dla Union Generela di Ladins dla Dolomites, chereda ite tla Cesa di Ladins a Urtijej en vender ai 29 de mei, à lité la presidenta nueva dla soziazion.

Do da set agn de impegn a cef dla Generela, ova la presidenta Zardini fat a savei da temp de ne ester nia plu a la leta per la maiour enciaria. Ti meisc passés ova la vizepresidenta dla Union di Ladins de Gherdeina Milva Mussner dé sia desponibelté y tratant ne él ruvé ite deguna outra candidatura.

Al prum pont al orden dl di dla radunanza fòvel l'aprovazion dl bilanz 2014, coche prevedù dal

Statut, che é vegnù aprové a una. Do à la radunanza tout dant la litazion per l'enciaria de president, ti dajan sia creta a Milva Mussner belau duta a una, con demé una stima desferenta y un astegnù.

Paroles de ringraziament per l'impegn porté inant da Elsa Zardini te chisc agn, per i trueps viadesc che ala à sourantout y per la pazienza che ala à messù avei, é vegnudes portedes dant da pert de desvalifs comembri dla radunanza, da presidenc dles autres unions de valeda y ence tres na letra da la presidenta de onour Ilda Pizzinini, che ne à nia podù tò pert a la scontreda.

N bel ringraziament ti é vegnù sport samben per sia desponibelté ence a la presidenta nueva Milva Mussner, aldò dla consaputa che se tò su chesta enciaria damana temp y impegn, y sovenz porta plu critiches che sodesfazions, y per la porté inant mess ester gran idealism y pascion per i ladins.

Elsa Zardini ti à dit n "gramarzé ben" a duc per la bela esperienza che àla abù l met de fé te chisc agn, che ti àla permetù de conesce luesc y persones de valuta de duta la Ladinia y da foradecà.

"Mia presidenza é steda n gran

Na presidenta nueva per l'UGLD

En vender ai 29 de mei à la radunanza generala dla soziazion lité per la maiour enciaria Milva Mussner, che ti à giaté l testemone da les mans de Elsa Zardini, steda presidenta per set agn alalongia

va inant da la pruma plata

segn de solidarité ti confronc de nos ladins de Souramont manco stravardé – àla dit – y ence se ne on nia podù porté a bon fin l'obietif dl referendum, i son contenta de avei podù arjonje almanco la reprejntanza tl Euregio per i trei Comuns ladins storics dla Provinzia de Belun, segnan ensci la desferenza da duc i autri neoladins. Volesse ti dì a duc chi che jirà inant che i ladins é lié da lingaz, identité y cultura, chisc é i ponc fundamentai che messon porté inant, vardan de ne strité nia sun chestions de politica y de giaté na bona acordanza con chi che ne governeia.”

Elsa Zardini à reingrazié i presidenc dles Unions che ti é stés vejins, i comembri dl Consei y i dependenc y colaboradours dla Generela y dla Usc di Ladins, prumdedut l'aministradoura Marion Kostner, y ala à recordé che ala restarà empò tl Consei dla Generela desche presidenta dla Union di Ladins de Ampez.

La radunanza à dapò lité i componenc dl Consei nuef dla soziazion: adum a la presidenta Milva Mussner y ai presidenc dles

Unions di Ladins Michael Moling dla Val Badia, Stefan Kasslatte de Gherdeina, Fernando Brunel de Fascia, Elsa Zardini de Ampez y Manuela Ladurner de Fodom, fajarà pert dl nuef Consei ence Raimund Grossrubatscher de Gherdeina, Edith Dapoz dla Val

Badia, Monika Rizzi de Fascia, Rosetta Lorenzi de Ampez y Carlo Agostini da Col.

En ultima à la radunanza lité i revisours di conc che sarà Luis Stuffer de Gherdeina y Luca Micheluzzi de Fascia. (lg)



L passaje de testemone anter Elsa Zardini y Milva Mussner.